

摘藻堂四庫全書薈要

集部

欽定四庫全書薈要

集部

宛陵集卷

二十九至
三十一

詳校官助教臣常循



欽定四庫全書薈要卷一萬四千四百六十九

集部

宛陵集卷二十九

宋 梅堯臣 撰

陽翟縣城凝嵩亭

西北望嵩色憶上大室時陟彼已不淺坐此安能知今
誰絕壁下但見前峯危正與曩未異目存迹焉追

王仲儀寄鬪茶

白乳葉家春銖兩直錢萬資之石泉味特以陽芽嫩宜

言難購多串片大可寸謬為識別人予生固無恨

依韻和王道損風雨戲寄

小雪纔過大雪前蕭蕭風雨紙窓穿而今共唱新詞飲
切莫相邀薄暮天

鬪鷁鵲孫曼叔邀作

脫命秋隼下鳴鬪自為勇爭雄在數粒一敗勢莫擁慙
將縮袖間懷負默而拱勝且勿苦欣猶驚辱與寵
和道損欲雪與家人小兒輩飲

陰雲濃壓野風獵樹高鳴寒禽並枝立頗以見物情目
前兩稚子為慰豈異卿欲置一壺酒且獨對婦傾

韓持國邀賦鬪山鵲

俗有巧鬪心畜此巧鬪禽搏擊無迅節爪觜自相侵胡
能知遠人角勝合百金鳳皇安在哉徒此望丹岑

依韻和酬韓仲文昆季聯句見謝

予前與道損游
西湖淨居堂因

至其
第

冬日晴且暖林塘思淨居往興都未盡遂經韓氏廬韓

氏兄弟賢各各趨義塗吾儕與之游何異田蘇俱經疑
反此質學陋慙無餘况茲諸少年高論傾國都以及治
民術縱橫無所拘又涉方外說於道曾不殊詩評杜兼
李字法褚與虞啜茗豈非好啗栗強為娛久厭官局檢
聊休體質舒次第極言笑左右排圖書終日欣博約貶
異正則扶所賴存泛愛未以我為愚持歸接士論頗亦
類販沽復聯長詩來味若餐瓊腴其辭多自損似欲大
厥譽顏子乃庶幾仲尼稱弗如不厭會遇頻雲龍實相

須最和躡麟趾舉步未敢渝

種藥

雲外陽翟山實與嵩步接山中採藥人能自辨苗葉當
須斲其根以遂素所愜野籜包舊土遠致風雨捷故本
含新芽枯筵帶空莢植雖乖地勢培壅得專輒冬誰論
臭香春定引蜂蝶豈惟識草木庶用補羸茶

答韓六玉汝戲題西軒

吾軒今於水吾居易為足誰與哦其間風窓數竿竹雖

無泉石清尚不愧茅屋所樂違俗喧此趣大已熟

和韓五持國乞分道損山藥之什

不種東陵瓜不利千畦韭山藥數十本帶土移野叟故
葉萎未醒傷根亦何咎既為君子好豈與騷人負騷人
比畫工丹青出其口欲分欄下苗馳奴仍置簞主人可
無吝所尚非獨有從茲各勤灌肯在園蔬後今雖勝曝
蓄畢意資玉曰人事固已然秘方看繫肘

送長陵清辨師歸寧

山房古柏暗近在漢陵邊天供不為樂母心常所懸朝
途髮根冷暮野鳥行先子道豈殊衆誰云絕世緣

依韻和李密學會流杯亭

園林固足勝景著必人賢將泛杯中物遠分湖水泉來
從百花底轉向衆賓前易醉緣多病陪公愧少年

依韻和韓子華陪王舅道損宴集

韓氏兄弟八人而七人在坐

雲低未成雪寒氣已侵席凍醪傾白濁乾果列紫赤風
微時破面亭敞宜張帟來望野興通古城何額額邀射

弓鈞開破的翦羽白助中聲喧呼不覺屢傾幘醉驚一
發功誰許百金易非等將帥能聊將賓友適中酒作暴
謔心親語多劇吾徒固不羈安可限常格去忌無俗流
起酌驚臧獲八龍觀諸韓頭角相戢迫參差玉峯前愛
慕不知夕誰嗟短景移能使客情釋為賀主人翁賢甥
無久隔此會舉世稀頻頻奚所惜

飲韓仲文家

飲酒衆所嗜未若朋會樂終日不為荒於時豈多作坐

客十餘人七子實棣萼杯行發嚴令孰不資善謔巧詞
劇猱捷辨機如弩彊醉舌強且遲罰觥奚屢酌正言訐
詭諛簡禮去酬酢迭嘲果與蔬相呼花間藥是非不親
親笑語何落落夜歸歡有餘孩稚扶仍嚔

玉汝贈永興冰蜜梨十顆

梨傳真定間其甘曰如蜜君得咸陽中味兼冰作質遺
之析朝醒亦以蠲煩疾吾兒勿多嗜不比盤中栗

王道損贈永興冰蜜梨四顆

名果出西州霜前競以收老嫌冰慰齒渴愛蜜過喉色
向瑤盤發甘應蟻酒投仙桃無此比不畏小兒偷

寄題滁州豐樂亭

泠泠幽谷泉近在青峯下使君去窮源林外留車馬一
徑穿篠深蔽日復瀟灑行盡逢泓澄翠影如可瀉雲樹
陰其旁造物將有假引水開石池結宇覆碧瓦乃知愛
玩心朝夕未忍捨近移溪上石怪古蒼蘚惹芍藥廣陵
來山卉雜天治春禽時相鳴賓從不應寡欲問淮南趣

還思洛陽社勝事已不辜吟觴無倦把

和韓仲文西齋閒夜有懷道損舅及予

冬日每苦短方愛夜漏永積雲寒擁齋徘徊延月影獨
能懷親友出門見參井是時發清詠筆若天驥騁

前此諸韓來飲獨仲連以小兒病不至明日仲連
有夜坐見懷之什因成答章

夜與賢豪飲方聞默坐時我斟相樂酒君詠寄來詩莫
恨殊喧寂真緣篤愛慈何當因雪興過此未應遲

奉和子華持國玉汝來飲西軒

我誠官局冷終日事靡括每耽古人書似與世俗闊同
道三四人來過慰饑渴迭相陳語言曾未厭怵怛日中
將過晡留飯具麤糲薄酒繼以斟不覺寒日沒愚妻方
罷沐洪飯愧倉卒凍婢昧煎和親調首忘髴每食各驚
顧誰謂不黔突倦僕暖吾薪饑馬飽吾秣馬無歸嘶聲
僕有顏色活安穩不知疲明釭仍為撥醉言實無次曾
未窮本末諸君競相先出口論莫奪復云天地間此能

有幾達我聞顏汗下恐後謗難遏其間常有言但未見
疵齷終當輕有若悔目已屢眦莫八反信哉羣玉林豈得
依朽枿吾心為之然收舌如斷割寄音謝豪俊茲蘊只
圭撮

和道損喜雪

密雪已迎臘隨風來拂巾偏知寒夜屋不管醉歸人暗
積空庭合偷裝衆樹新沃田將望歲壓癘且忘貧薄厚
曾無意飄揚似有因既能先覆物乃見未饒春作陣從

天落何功得地均暫欣供一賞惜逐馬蹄塵

答持國遺魴魚皮膾

海魚沙玉皮翦膾金虀醖遠持享佳賓豈用飾寶劔予
貧食幾稀君愛則已泛終當飯葵藿此味不為欠

與仲文子華陪觀新水磴

湖壖此興磴許俗見仍稀激射聊因勢回環豈息機水
如崑下過人悟雪中歸坐想韓夫子心應不道非

與道損仲文子華陪泛西湖

冰消湖已綠，渺渺鴨頭春。
船學吳兒刺，吟稀楚老新。
對山憐去鳥，隔樹識遊人。
誰念滄江上，風柔採白蘋。

和持國石薜

石根雲常蒸，老薜密於毯。
濕翠連澗陰，淨綠繞品坎。
不異泉上芹，丰茸猶可擘。
安知山中客，遠寄趣已淡。

同諸韓飲曼叔家

富貴豐盤餐，日可侑清角。
不與賢者俱，飽食何所學。
吾友雖日貧，邀賞不辭數。
質衣為酒肴，出論輕管樂。
其饌

精且甘刀几孰親握是時予苦眩引去意頗確羸馬雪中歸醉醒誰復較

和仲文西湖野步至新堰二首

泱泱堰根水層層湖上田寒魚猶著底白鷺已飛前履
惜春泥滑衣從澁蔓牽偶未成野望歸興自留連
潭上水容暖野中寒吹橫行塘人已晚吟步日難更凍
地坼枯龜斷水流破鏡王都且不遠樂此林泉性

送韓奉禮

崇道

將欲侍親去獨要予贈言世風還自有文體不須論稍
愛春波急微生野岸根行舟寧覺遠幾日到都門

諸韓來會別

諸韓行有日別思更依依獨歎從予少還看似子稀呼
童聊奏酒灑水為開扉蘇合染裘美雪中閭闔歸

送仲文

三年不出戶孝行閭井聞近俗遂知化豈非由所薰御
琴趨國門何必長守墳美哉若君子忠可移於君

送子華

識君雖恨晚說詩屢解頤
吾徒固難合所合終不移
冒寒躍馬來且言行有期
河上冰始圻輕棹去未遲

送仲連

別緒如亂絲欲理還不可
却悲嬌女詩寧戀更效左
是時遠道懷紛紛上歸舸
憐君正如此豈任風雨後

送玉汝

談笑去拘忌乃見相與深
風騷得往返但見非知音
明

日車馬北豈不動離襟春風靡蕪綠別恨生遙岑

玉汝遺橄欖

南國青青果涉冬知始摘雖咀澁難任竟當甘莫敵來
從萬里外或以苦口擲所投同木瓜欲報無瓊璧

和王待制出郊馬上口占寄兄道損次韻

日暖寒郊不起風使君車騎出城中遙知望處思兄弟
鴻鴈連連下遠空

寄題蘇子美滄浪亭

聞買滄浪水遂作滄浪人置亭滄浪上日與滄浪親宜
曰滄浪叟老向滄浪濱滄浪何處是洞庭相與鄰竹樹
種已合魚蟹時可緡春羹茱白菰夏鼎烹紫蓴黃柑摘
霜晚香稻炊玉新行吟招隱詩懶戴醉巾中憂患兩都
忘還往誰與頻昨得滁陽書語彼事頗真曩子初去國
我勉勿迷津四方不可之中土百物淳今子居所樂豈
不遠埃塵被髮異秦伯結客非春申莫與吳俗尚吳俗
多文身蛟龍刺兩股未變此遺民讀書本為道不計賤

與貧當須化閭里庶使禮義臻

送河東轉運劉察院

塞郡屯師久飛芻始得人權傾擁旄將詔輟繡衣臣舊
里過京洛辭家渡孟津紫裘蘇合染驄馬玉環辰榆莢
關頭雨梨花谷口春高車方陟險豐膳暫違親山勢北
臨岱地雄西隔秦行臺知不遠能使問安頻

依韻和玉汝對月見懷西軒

坐見沙頭月復憐衣上輝正如從我飲還欲照君歸相

逐影徒是共嗟歡已非夜深依岸落寒色入傷違

依韻和玉汝舟中見懷

遙聞出舟望始愛川原廣春冰未破時旋拉寒篙響鳴
鴈似相隨遠日聊一仰能知狀物工把筆獨見想

同道損持國訪孔旼處士

高廬當大道節士不肯過窮巷獨秉德車馬一何多勢
力走諛諂禮義服委佗是以被褐人長甘北山阿曰今
豈有愧漁上有行歌

二月十四夜霜

欣欣東園杏忽值春飛霜粲然彼繁英萎若出沸湯既能與之榮而復使之傷向來肅殺時已共百卉黃今同草吐心不似草心長天理固難測誰要必其常

送謝師直南陽上墳

躍馬清明前行將拜孤壠松吹送悲聲緣纓淚如湧三歲宰南方奠嘗阻親捧山下獨徘徊雨來雲蓊蓊

奉和持國曼叔方叔送師直歸馬上同賦之什

郊外桃李花赤赤復白白為君歌古曲行子在南陌衆
人各已歸春風送無跡安知春風送到處花當客我病
出獨難併請春風謫此情無遠近千里不能隔

和韓子華寄東華市玉版鮓

客從都下來遠遺東華鮓荷香開新包玉臠識舊把色
絮已可珍味佳寧獨捨莫問魚與龍予非博物者

喜雨

冬涉春無雨侵晨忽沛然燕曾知社後雷未發聲前細

濕林花暗輕霑土脉全看看一百五風勢莫狂顛

送王判官之江陰軍幕

易知

往時初渡江頗愛江南美誰知坐臥間思及烟波裏絮
逐鮎魚繁鼓添蕤線紫君行語風物到日應相似

送王龍圖源叔之襄陽

忽驚車騎臨乃是荊州長登堂語出處陳事猶夢想別
逾二十年相遇今始兩爵位異禮數齒髮可下上但問
我何有而獨不愛曩敢告守拙愚此道未嘗枉行當至

峴山羊公存廟像簫鼓有時奠道德其可仰

依韻和持國新植西軒

開地臨廣衢崇崇十餘畝新軒稍偏北治圃亦西酉
盎中植菡萏水不過升斗小桂未得地驗活徒指朽
上乏幽禽啼下多穴蟻走藥苗雖無補欲比山中有
澆灌同一時萌芽或先後松株不滿尺廊廟色已厚
稟性久且堅物理豈無偶椶櫚仍未大散葉纔八九
夏綠與冬青各各自為友吾軒還處西脩竹爾後取
兩莫論是非但

可吟對酒

送師直之會稽宰

其兄在
餘姚

天下風物佳莫出吳與越
新罷吳官來又隨越舸發
連宰吳越間皆邇蛟鼉窟
伯氏復同郡邑境接民岱寧
將內隔外正似肉附骨
姚江遺魚蟹稽山奉笋蕨
足得相交歡高堂未華髮
送子意不盡念逐有明月

西湖觀新出鶯兒道損持國曼叔請予賦之

春葩畏雷後殼開形已完
嫩毛輕染蘂小掌未全丹
見

物初能噉浮波尚怕寒山陰無道士更長換應難

宛陵集卷二十九

欽定四庫全書薈要卷一萬四千四百七十

集部

宛陵集卷三十

宋 梅堯臣 撰

送李密學赴亳州

倦輸關內粟遂請潁川符治績可稱最士民將以蘇
都君命重苦縣祖風殊仙檜留陰在甘棠即化敷行舟
通遠水候騎溢長衢他日人懷望烟雲自滿湖

送樊秀才歸安州

開元有謫仙酒隱向安陸子嘗慕其人文字不拘束月
下每醉吟落紙輒數幅今當安陸歸白酒村中熟一名
猶未成雙親淚盈目切莫苦銜杯無心不擇祿去去烟
水間野禽嗥古木聞聲不得名將投山舍宿此趣自可
嘉非如走塵轂

依韻李密學合流河口見懷

二水交流抱閭井清潭幾曲自淵回已浮畫舸遙遙去
更愛雙鷺泛泛來

觀理疏

野薺不堪食蕪菁今正肥夏畦人所病老圃方可窺乳
雀爭銜蝶鳴鴉各護兒於陵豈復有空學桔槔為

哭尹師魯

謫死古來有無如君甚冤文章不世用器業欲誰論野
鳥災王傳招辭些屈原平生洛陽友零落幾人存

泛舟和持國

緣源去未窮夾岸樹濛濛弱蔓低侵水殘芳不隱叢浣

衣思越婦折笋擬江童薄暮迴船處潭魚動鏡中

欲晚訪韓持國忽道損見過不克往持國示詩因
答

西雲沈日脚命僕駕我車我車已在庭有客方詣廬談
笑不覺夕雞黍且煩渠重約勿以怪但當摘園蔬

送京西轉運李刑部移京東轉運

錢

列藩環王都遂分東西道統制連別京守臣多碩老外
臺持權綱才具必美好公今且更踐入用頗不早乃令

山東粟餉饋歲可保古路趨汶陽長風吹綠草

送李庭老歸河陽

五月馳乘車歸心豈畏暑道上多清陰日中不遑處函
谷自控帶大河無險阻時平獨往還拜壽觴屢舉

詠雙杏子其核亦然

子核成雙杏將寄同心人定棲鴛鴦魄為物豈無因

和王仲儀楸花十二韻

春陽發草木美好一同時桃李雜山櫻紅白開繁枝楸

英獨步媚淡紫相參差大葉與勁幹族夢密自宜圖出
帝宮樹聳向白玉墀高絕不近俗直許天人窺今植郡
庭中根遠未可移但欣東風來不恨和煦遲山禽勿戲
踏蜂蝶休掇之昔聞韓吏部為爾作好詩愛陰無纖穿
就影東西隨公今亦牽此端坐曾莫疑

目昏

我目忽病昏白晝若逢霧窺驚隻物雙書輒下筆誤來
人髣髴是飛鳥朦朧度紆紆孰辨別此已忘好惡

送韓八太祝歸京師求醫

少年絜而腴茸茸頷有鬚冒熱跨馬去去去天王都借
問去何謂就醫將疾驅客曰實誑我健壯其非夫敢告
固不給但怪所見愚瘠者未必病病者未必癯天馬不
著肉日走萬里途山熊豈無膏養體唯恐痛滯結在於
內安得形肌膚厥貌雖美好厥疾勿須臾療之欲其漸
熾之非愛軀此行不飲別安得持酒壺

記春水多紅雀傳云自新羅而至道損得之請余

賦

赤羽異蒿鷄來自東夷國羣集成臯間翩翩皆一色舉
臆發朱砂為瑞應火德穿屋彼非類啄粟慙與食清聲
殊啁啾所蓄每陋逼應當放之去重展萬里翼

持國遺食

乞食非為貧妻病妾且死晨爨不煖釜朝飯亦輟亡遺
我我所恤食我我所恥我恥曾我求我恤寧我止應乏
豈在豐赴義實未鄙漂母殊下鄉為惠得終始

捫蝨得蚤

茲日頗所恆捫蝨反得蚤去惡雖未殊快意乃為好物
敗誰可必鈍老而狡天穴蟻不嚙人其命常自保

同道損世則元輔游西湖於卞氏借雙鶴以觀

塘蒲蔭綠水菡萏艷脩渚想像華亭野但欠鳴鶴侶同
來三四人趣向頗相與思見此清禽無能覲翔羽城隅
有大第世本官吳楚嘗同太湖石不惜持金取欲作園
林勝園林寧暇觀今當問其家借賞無吾拒果亦致之

來奮毛如喜舞雖生滄海心翅重不得舉還爾稻梁貪
崇丘在何所

送上虞孫主簿

稽山參雲深剡水與天碧行將啼鳥親翫不游鱗隔況
世住新安又嘗為粵客風物知所諳窮幽梯翠壁

寄題金州孫御史處陰亭

有形則有影畏影當念形日月難久晦處陰乃暫停光
照不復離疾走何所寧當是誚尼父我輩烏忍聽結廬

雖可託夜燭亦熒熒直躬觀罔兩將此同醉醒

石榴

榴枝苦多雨過熱圻已半秋雷石罌破曉日丹砂爛任
從雕俎薦豈待霜刀判張騫西使時筠醬同歸漢

七夕

古來傳織女七月渡明河巧意世爭乞神光誰見過隔
年期已拙舊俗驗方訛五色金盤果蜘蛛浪作窠

同諸韓及孫曼叔晚遊西湖三首

晚日城頭落輕鞍果下涼野蜂銜水沫舟子剝菱黃木
老識秋氣徑幽聞草香幅巾聊去檢不作楚人狂

爍電未成雨涼風先入衣青天忽開影紅日尚餘暉
蛺蝶作團起蜻蜓相戴飛嘲諠不覺夕跨馬月中歸

舟中演滿意不淺却坐林塘景欲昏翠色蜻蜓立菱葉
青絲騷裊秣城根

韓玉汝遺澄心紙二軸初得此物歐陽永叔又得
於宋次道又得於君伯氏子華今則四矣

三得澄心紙吾嘗再有詩粗能條本末不復語興衰堪
入右軍跡慙無幼婦辭君家兄弟意將此比烏絲

麝香

游伏柏林下食柏遂生香空知噬臍患豈有周身防赤
豹以尾死猛虎以睛喪儻或益於用捐軀是其常

凌霄花

草木不解行隨生自有理觀此引蔓柔必憑高樹起氣
類固未合縈纏豈由己仰見蒼虬枝上發彤霞藥層霄

不易凌樵斧誰家子一日摧作薪此物當共委

七月二十一夜聞韓玉汝宿城北馬鋪

暗樹秋風擺葉鳴桃枝竹簟冷逾清孤燈淡淡短亭客
半夜蕭蕭聞雨聲

夢過三陵

夢過漢陵間秋風石馬閒當年侍臣淚泣盡向三山

詠扇

翦紉成薄質誰將擬月輪閤竭夏后德同我天王仁及

至為時用豈必美畫人何憂秋風來退保藏其真

送曼叔襄城尉

昔君乘紫騮來獵荒城下復乘紫騮去不逢亭長罵溪
風欲涉時山雪獨歸夜此趣信所諳羈官莫悲咤

送吳給事自許昌移淮西

直道昔參輔獨將天下憂忠言悟明主退請拜諸侯坐
閣政方舉移藩心所求蔡人迎且喜許俗愛難留夾路
車徒盛分墻禾黍秋穆陵無夜閉仁化自公修

亳州李密學寄御棗一籃

沛譙有鉅棗味甘蜜相差其赤如君心其大如王瓜嘗
貢趨國門豈及貧儒家今見待士意下異盧仝茶食之
無厭飫詠德曾未涯

九月五日夢歐陽永叔

朝鏡惡白髮夕夢對故人常恨道路隔忽喜顏色親相
笑勿問年青銅早傷神雞鳴天欲白向者猶疑真

自尉氏南至京皆水及人脛

陸行畏水深舟行畏水淺河流去時閣涂潦歸時踐事
與時相違我慙行處蹇人生莫為客為客此安免

九月十六日自許昌迴至京師胥平叔家中道迂
於郊外

今日至國門二子來迎我適遇信陵塚塚棘秋葉墮翩
翻隨人飛拂馬右或左謂此獨無情亦與吾意可

裴如晦赴河陽幕

豪風一夜動作雪欲愁客客莫苦嗟行農望明年麥方

來笑語同又是關河隔主人賢且智不待子所畫

送韓子華十月拜掃

白露已變霜孝心竟悲惻薦衣如念存拜隴不遑息帶
劍蓬池外兼程困馬力禮畢便當還於誠乃為得

送韓六玉汝宰錢塘

予嘗訪林逋湖上

頃尋高士廬正值浸湖雪雪中千萬峯參差縣前列僧
居或隱見岸樹隨曲折驚鳬如避人遠向寒烟滅潛希
為子男僮得遂疎拙今逾二十年志願徒切切方聞落

君手與我曾未別景多詩莫窮歸載壓車轍

得曾鞏秀才所附滁州歐陽永叔書答意

客從淮上來往問故人信袖銜藤紙書題字遠已認既
喜開其封固覺減吾吝新詩不作寄乃見子所慎向來
能如今豈有得觀豐南方歲苦熟生蝗復饑饉憂心日
自勞霜髮應滿鬢知予欲東歸曉夕目不瞬貧難久待
乏薄祿藉霑潤雖為委吏冗亦自甘以進相望未得親
終朝如抱疾

追詠崔奉禮小園

前此訪君時已觀堂宇邃安知中屏開自有幽林致花
蹇崑桂紅石壁雲根翠正當秋風來不見搖落意日得
吟其間何須去為吏

宋中道快我生女

爾嘗喜詛予生女竟勿怪今遂如爾口是宜為爾快亦
既以言酬固且殊眎睚慰情何必男茲語當自成

詠宋中道宅梭櫚

青青椶櫚樹散葉如車輪擁籜交紫髯歲剝豈非仁用
以覆雕輿何憚尅厥身今植公侯第愛惜知幾春完之
固不長只與薺本均幸當勅園吏披剝見日新是能去
窘束始得物理親

詠秤

聖人防爭心衡權為之設後世失其平有星徒爾列物
物尚可欺銖銖不須別將淳天下民安得必毀折

詠象韓子華邀賦

軀大力無用遠物賞馴柔食芻與飲水百倍於馬牛猶能絡金羈不可伏車輶蒼舒曾智秤千鈞空壓舟

依韻答惠勤上人

釋子本樂靜宜不事物牽我慙姑蘇守復賞杼山然三歲與之別其學已增前忽此有來贈老拙謬耽研

答顯忠上人

驅馬傍馳道歸自許西偏高車非舊貴立避槐樹邊心雖欲往謁僕餒行不前是甘處窮巷晨笑微生烟儻有

好事者扣門與留連或有袖中詩語熟氣頗全曾不類
緇褐始可令勉旃京師百許寺知幾相差肩

送韓仲文奉使

往使匈奴國持節豈辭遙朔北正苦寒風汝與雪飄燕
山何處是漢銘應已銷前車渡冰河後騎鳴金鑣行行
至穹廬尊我不敢囂玉爵親獻酬名裘進孤貂禮成復
命日苑柳舒楊條

送劉司勳奉使

受命出絕域北至單于庭馳鳴沙磧遙馬倦朔雪零幽
州古道上胡笳應夜聽嘗聞昔時語南看北辰星使回
儻可記乃得驗天形

依韻和歐陽永叔秋懷擬孟郊體見寄二首

我居西北地秋無東南風木脫不塞望高臺空九重音
塵安可得鴻鴈鳴霜中日看紫苔生乃見三徑窮一聞
離騷篇寫盡楚客胸胸懷如寶匣夜夜吼生銅

秋思公何高堆積自崿嶮出為悲秋辭萬仞見孤聳念

我老於詩我髮實種種而復傷故人故人多作塚陰風
夜木嘒窸窣聞鬼悚獨我忘形骸百事乃纖冗不眠霜
月上霜月如可捧

裴如晦自河陽至同韓玉汝謁之

朝聞單騎歸徑走至其第扣門童僕頑拒我色甚戾不
顧遂登堂有馬堂下繫辨詐大呼卿稍應西屋際逡巡
冠帶出青綬何曳曳有似縮殼龜藏頭非得計况與二
三子交分久已締怨爾避客尤新還復新壻

詠王宗說園黃木芙蓉

水中兼木末相擬有嘉花
玉蘂坼蒸栗金房落晚霞
涉江從楚女采菊聽陶家事
與離騷異吾將寧以誇

二馬

舊馬十年跨老劣多緩行
新駒三萬錢頗愛舉蹄輕
不使異芻秣均養存其情
君門趨早朝風勁力已生

依韻和許主客詠影

答影陶潛興長吟為我聽
與之相遇日曾不異於形動

靜隨生趣存藏委曜靈壯周疾走意推本置諸銘

寄題周源員外衢州萃賢亭

昨朝江南客語子川上亭有時飛雨來不見前山青卉
萼人未識鳥響日可聽既將遲賢者無使童僕局

答楚僧智普始與吳僧顯忠來過今見二人詩進
於舊矣

我初見子時子作楚人語復與吳客來音俱變齊魯乃
知久處益薰猶可同舉更當富於學茲言聊以補

鴨雛

春鴨日浮波羽冷難伏卵當因雛抱時託以雛窠暖三
旬殼既坼乳毛寒脰短雛寧辨其雛翅擁情欸欸一日
向水涯所稟殊未斷泛然去中流雛呼心憲憲人之苟
異懷負義不足算有志在養毓勿論報德限

有覩十一月七日

來恨我馬遲去恨我馬疾馬蹄塵作雲已隔粲然質時
時顧且遙亂緒如有失

10/10/10

10/10/10

宛陵集卷三十

欽定四庫全書薈要卷一萬四千四百七十一

集部

宛陵集卷三十一

宋 梅堯臣 撰

杜挺之贈端溪圓硯

雪壓古寺深中有卧病客訪之語久清饑馬齧庭柏按
頭蠻溪硯其狀若圓璧指此欲為贈而將助吟席非意
予敢貪既拒頗不懌大出褚中有素許當自擇強持慰
勤心歸以示朋戚哂曰豈其然為汲寒泉滌滌彼偽飾

物紙乾見頑石清晨走髯奴無厭願求易拜賜遂如初
明月懷吞蝕微分鸚目瑩尚漬墨花碧詞荅謂我愚悔
復料已逆明日未央朝執手笑啞啞

吳冲卿示和韓持國詩一卷輒以為謝

葉公所好者熟已識頭角一日真物來駭汗沛且渥我
初見韓子蜿蜒噴雷電子復蛟龍文氣象不可捉畏懷
但驚顧得與前事較

新息重修孔子廟記

新息古邑也自漢以來幾因亂而孔子之廟歲享不絕
于今雖邑宰有賢否祀典繫國家也儻不賢屋隳不葺
有矣祀其廢諸慶歷七年清河張君伸為是邑始勤於
治民謹於條約恪於事上既而民信訟且簡乃修孔子
祠及祭器予未知君之果學耶學而果知道耶以斯舉
則君似有本者學者未必信奉如之嗚呼孔子之道與
天地久與日月昭一郡一邑之廟不足以光顯厥德報
厥功也略究為郡邑之人少誦其書長就其藝遂得其

祿忍負不為一出口之勞完其廟至使瓦墮簷風雨壞
桷甍缺階塵昏像犬豕穴墻垣往來其間哉新之無是
患庶幾賢已然則苟因為利廣爾宮俾不肖有說非予
望於君也況邑隸蔡守吳公輔臣大儒名重天下間君
能是得不樂耶予思昔忝邑時見邑多不本朝廷祭法
往往用巫祝於傍曰牛馬其肥癯疫其銷穀麥其豐瀆
恃為甚予既革之君觀有若是者當改為以從著式云

范景仁席中賦葡萄

朱盤何累累紫乳封霜厚今為馬谷繁昔釀梁州酒乃
知西土珍漢使傳應久

夜聽鄰家唱

夜中未成寐鄰歌聞所稀想像朱唇動髣髴梁塵飛悞
節應偷笑竊聽起披衣披衣曲已終窓月存餘暉

宋次道得廣南金橘為餉且有詩因和酬

越橘如金九爛然已盈筐誰傳嶺外信尚帶霜前葉莫
嫌道路遠得與樽俎接主人無吝心懷歸予敢輒

李廷老席上送韓持國歸許昌

得早字

馬蹄踐霜華遊客歸何早重裘不畏寒
況復非遠道誰言未顧期登第
鬢如葆解裝喜可知月下金壺倒

送韓持國

曰予非才敏乃與世寡游三四洛陽友過半已成丘
晚節五六人文行皆潔修韓氏棟蓂盛於我為薰
猶君比衆最篤我唱君非酬昔我竹軒下被窓風颭颭
君時不厭過逍遙談未休頗為俗士憎恬不防吝尤
邇來我還

都君亦辭舊州舊州君所隱安得此久留雪晴命駕歸
使我生悲愁誰見湫水上定更不驚鷗

遲月

遲月月已上清光在高木未能照我庭團團隔東屋

風笛

既殊出塞聲還非江上聽夜吹送悠揚高樓月方迫

霜鐘

昔向寒溪卧遠寺撞白雲今也趨早朝殘月馬上聞

鳴琴

雖傳古人聲不識古人意古人今已遠悲哉廣陵思

和曹光道詠直廬屏中六鶴

漢家為瑞雙黃鵠只道飛翻太液池不似雲屏六畫鶴
帝宮深處有人知

晚歸聞韓子華見訪

門外多車騎後迹亂前蹤誰識此來過塵蹄重複重歸
有野僕言恨不故人逢豈無肴酒設所向乖所從未能

一往見懶拙其必容

送丹陽新守李國博歸洪州

蔡水冬不枯唯愁夜冰結歸船及暖下窮臘未飛雪淮
潁地漸偏川上雲常泄幾日接春波南風楚江徹拜親
懷郡章予慕嗟才劣

食齋

世羞食齋貧食齋我所甘適見採齋人自出國門南土
蠹瘦鐵刀霜亂青竹籃携持入凍池挑以根葉參手龜

不自飽食此尚可慙肥羔朱尾魚腥羶徒爾貪

甘陵亂

甘陵兵亂百物灰火光屬天聲如雷雷聲三日屋瓦摧
殺人不問嬰與孩守官迸走藏浮埃後日稍稍官軍來
圍城幾匝如重鎚萬甲雪色停皚皚孰敢專輒但取裁
黃土始堅難速頽

夜飲席上賦松子

風松有霜子吹落幽人庭幽人畏狼籍日掃出巖扃誰

將稱遠物乃信涉滄溟

送李審言殿丞歸河陽

大河冬合時上可馳車馬歸子從橋安黃流在冰下沉
命使於家其美世為寡是宜飭以行慰此懷慕者

送王宗說寺丞歸南京

晏歲欲飛雪滿天含凍雲犯寒單騎速獵吹紫裘薰庭
鵲還先喜池鴻去始聞公應問貧賤善說莫如君

李審言將歸河陽值雪遺金波酒

朔吹卷天吼遠郊無鳥飛忽驚開戶白昨夜打窓微閤
巷我方懶關山君獨歸翻能寄醇酎為此解寒威

對雪憶往歲錢塘西湖訪林逋三首

昔乘野艇向湖上泊岸去尋高士初折竹壓籬曾礙過
却穿松下到茅廬

旋燒枯栗衣猶濕去愛峰前有徑開日暮更寒歸欲懶
無端撩亂入船來

樵童野犬迎人後山葛棠梨案酒時不畏尖風吹入牖

更教牀畔覓鴟夷

元日朝

萬國諸侯振玉珂
踏雲朝會雪初過
欲聞鳳管天邊度
數聽鷄人樓上歌
放仗旌旗方偃亞
迴頭宮闕更嵯峨
謬陪王屬曾何補
泛泛慙同上下波

荅祖擇之遺新羅墨

海上老松死霹靂
燒瘦龍胡人犀皮
膠團煤烟膏濃色
奪陽烏翹來涉溟
渤重君獲乃為贈
我謬蟲鳥蹤且作

異土玩不愧西域節

對殘雪懷歐陽永叔

窮臘一尺雪跨春氣逾嚴童僕苦病瘵庭戶無與杙日
消夜復凍霰積泥相醺懶出獨懷遠何由寄江帆

寄題時上人碧雲堂

望望佳人來未來雲已暮當時千里恨不獨看雲故何
此啟虛堂定知吟秀句還會古人心古人非特賦

和宋中道元夕二首

結山當衢面九門華燈滿國月半昏春泥踏盡游人繁
鳴蹕下天歌吹喧深坊靜曲走車轅爭前闔盛亡卑尊
靚妝麗服何柔溫交觀互視各吐吞摩肩一過難久存
眼尾獲笑迷精魂貂裘比比王侯孫夜闌鞍馬相馳奔
春風來解吹殘雪燈燭迎陽萬戶燃竟看繁星在平地
不妨明月滿中天赭袍已向端門御仙曲初聞法部傳
車馬不閒通曙色康莊時見拾珠鈿

李國博遺浙董建茗

吳薑漬吳糟越茗苞越籜咀辛聊案杯啜味可奴酪但
拜故人貺何言為物薄我心易厭足不比填溝壑

送臨江胥令

初從桃源還却向竟陵去今作中州官山水不曾飫且
當傳竹枝莫學乘籃輦雲木杜鵑時千崑響行處

寄題滁州醉翁亭

瑯琊谷口泉分流漾山翠使君愛泉清每來泉上醉醉
纓濯潺湲醉吟異憔悴日暮使君歸野老紛紛至但留

山鳥啼與伴松間吹借問結廬何使君游息地借問醉者何使君閒適意借問鐫者何使君自為記使君能若此吾詩不言刺

戊子正月二十六日夜夢

自我再婚來二年不入夢昨宵見顏色中夕生悲痛暗燈露微明寂寂照梁棟無端打窓雪更被狂風送

賜緋魚

蹉跎四十七腰間始懸魚茜袍雖可貴髮短齒已疎兒

女眼未識競來牽人裾不知外朝衆君恩慙有餘

和答韓子華餉子魚

南方海物難具名子魚珍美無與并完鱗全乙異臭腥
素鹽漬曝生花輕其頭戢戢筠筐盈出自通印時所評
遠涉川陸來都城親賓交遺已見情食指嘗動吾竊驚
果獲異味亦足明

和答韓奉禮餉荔枝

韓盛人所希四海饋名物韓復未踈予分珍曾不一莆

陽荔子乾皺殼紅釘密存甘尚可嘉本味固已失遥思
海樹繁帶露摘初日安得穆王駿能置萬里疾

閏正月二日夜張氏納婦

太素子

婚姻貴及時周有標梅詩雪後花將發人歸室且宜坐
中傳漏鼓戶外轉星旗環佩遥聞出當脩廟見儀

酌別謝通微判官兼懷歐陽永叔

識君童稚時而今君齒壯不見二十年顏貌已非向親
戚多零落欲語還悲愴更問平生交久從滁水上君又

滌水歸寄音傾桂釀儻復二十年吾馬保無恙

和永叔郡齋聞百舌

響舌能令百鳥羞聽時丹杏發山郵春雲不定雨來急
濕翅蒼茫高樹頭

送陶太博通判廣信軍

平時易水頭不復起邊愁壯士去來久寒波空自流臨
塘移鷺羽隔戍見羶裘半似江南美軍和賸宴游

荅王太祝卷

整

朝迴泥塗不可出，餓馬倦僕驅之頑。閉門獨與古人語，
黃卷未終聞扣關。賢哉公族肯來顧，詩袖大篇令我刪。
珠光玉瑩絕瑕類，強欲指撝徒羞顏。自同培塿最淺狹，
安得與子論丘山。

雨賦

春雨之至，兮風呵而雲導，在上為膏，在塗為淖。被末漸
本，潤萬物者歟。施及天下，不收報者歟。入波而隨流，因
積而成潦。專好而失道者歟。壞瓦漏屋，蒸菌出木。過而

為酷者歟朝使人愁夜使鬼哭迷而不知復者歟將告之雨雨無聽也將告之天天且負也窮居知命是何病也意

送張太博通判袁州

君非身尤謫南州南方尚鬼其俗媮蛇為鄰虎為隣丹茅苦竹深幽幽邑人祠鬼拜古樹竹杯一仰來烹牛牛死齧懼常不幸誰得禁止專鋤鉤借曰未信君且往民將語怪君聽不仰山頭有行舟

依韻和宋中道雨夜

暗驚料峭寒春雪兼春雨知勝早朝人間眠不開戶丘
壑豈無容泥塗還自取誰吟何遜詩不覺逢逢鼓

讀裴如晦萬里集書其後

君自萬里迴遂成萬里集其詩二百篇文字必已立定
應侔前人未嘗有蹈襲古溪蠻鐵刀出塚土花澁誰將
飾以玉鐔上光熠熠宋子序其端精悍孰鉗繫搜新造
空蒙俗眼不得入示予要賦之短戈慙後執

見胥平叔

歷君門兮九重雲默默兮欲雨隱翠幕兮觀予心眷眷
兮不語

宣麻

彬美下一國曾無相印酬莫驚除拜峻自是戰功優壯
士頗知勇諸儒方貴謀淮西封亦薄裴度死生羞

朧月

夜晴初見月雲薄未分明高樹尚無影遠鴻時有聲下

階嫌履濕閉戶認苔生寂寂墻陰暝更長已漸傾

兵

太平無戰陣漢卒久生驕金甲不曾擐犀弓應自調嗟
為燎原火終作覆巢梟若使威刑立三軍豈敢囂

泥

一夜添春雨中衢長舊泥屐粘憂折齒馬滑畏顛蹄去
啄從江鶴相呼任竹鷄朝來放朝請始與逸人齊

聞韓仲文使歸

傳道使車迴柳條黃未開曉寒非絕漠春色近章臺名
馬北方至賓鴻南國來明朝齋祓見天子始稱才

未晴

未晴初止雨蒸潤尚侵衣缺月如羞出荒雲不肯歸杏
花朱欲綻梅萼雪將稀遠鴈來何急衝風濕翅飛

夜陰

月色明還暗雲寒散復濃古堂移魍魎積霧合蛟龍濕
菌飛螢出蒼苔上朽重獨吟嗟向老氣溢覺偏慵

夜晴

新晴月正明，頻聽夜鳥驚。
未向高枝穩，時為繞樹聲。
群飛自紛泊，衆鳥不屏營。
躁靜於焉見，誰能度物情。

古鑑

古鑑得荒塚，土花全未磨。
背菱尖尚在，鼻獸角微訛。
月暗蝦蟆蝕，塵昏魍魎過。
但令光彩發，表裏是山河。

橐駝

鳴駝出西域，銜尾自連連。
漢驛凌雲去，胡人踏雪牽。
常

時識風候過磧辨沙泉老覺肉封側猶蒙錦帕鮮

李庭老許遺結絲勒帛

紉絲作長帶正勝茱萸紋冉冉仍垂紉鞅鞅自有薰鮮
華非稱我脩飾未如君曾不日來取賢哉知禮云

貧

生甘類原憲死不學陶朱但樂詩書在未憂鐘鼎無恥
隨波上下難免鬼掀歛陋巷曲肱者終朝還似愚


行僧

風衣何揭揭有若瓠葉翻塵土不遠去白雲藏石門

宛陵集卷三十一

謹案卷三十一第一頁後八行新息重修孔子廟
記按是集記賦銘等間有編入詩中者因各本
皆同姑仍其舊

第三頁前五行披衣曲已終按宋元詩會披衣作
須臾



總校官庶吉士臣張能照

校對官庶吉士臣戴心亨

謄錄舉人臣羅步雲

謄錄監生臣徐繩玉

欽定四庫全書薈要

集部

宛陵集卷三十四

二至

詳校官助教_臣常循

欽定四庫全書薈要卷一萬四千四百七十二

集部

宛陵集卷三十二

宋 梅堯臣 撰

送范景仁學士歸蜀焚黃

蒼山過秦梁山盡見川陸下馬古成都訪壑得喬木掃

擇開奠席隕淚濕俎肉當時相如歸徒自盛車轂不聞

有是為事乃今古獨還因問耆舊亦莫遺隱卜荒祠古

柏下殘月杜鵑哭憑君約史筆書作西來目

送宋中道鄭州拜掃

酣酣道傍杏戢戢壠上柏不知烟火禁但感風露易開
闌掃墓隧向樹繫車軌灑淚有餘悲麒麟高幾尺

送韓子華歸許昌

不值風雨暴杏過梨已開社後清明前鶯與人歸來湖
中水方漫誰共泛其隈儻有問顛顚顚未忘盃

鶯

涎涎隻來鶯飛飛自舞空輕如漢家后斜避楚臺風斗

折撩沙甯相高接草蟲向人全不畏切莫入吳宮

送周衍長官知遼州

二月遼陽去遼陽草未生春風吹胡沙卷起黃雲平土
人耕耨晚種黍何時成塞地寒且薄百役子宜輕

寒食

墳塚徧青山高低占原谷向來路已荒今迷問樵牧涉
水到雲林隔崗聞近哭沃酒白楊下悲風何颼颼雨止
梨園殘鳩聲在茅屋

依韻和太祝同諸君遊園湖見寄

陽春何處來客自商丘至一唱新辭工始見故人意園
林誰與遊卉木欣已媚花上有微陰水邊無近思遙憐
數觴豆何必親歌吹牧馬憶當時招延遺舊地不逢浮
沼鴈但見銜魚翠日子謬詞律答句嗟蕪累安能接賢
彥樂事聯輕騎獨不負春風塵纓此懷愧

聞學士院試含桃薦寢廟詩擬作

交交鳴谷鳥粲粲熟荆桃寢廟此先薦離宮將以遨既

同羞組實且異獻溪毛露穎明朝日朱光逼赭袍戴經
傳自久漢令著方高天子從茲食羣臣賜亦叨

韓子華約遊園上馬後雨作遂歸

誰約玩春物狂風雲驟開擺叢多落葉蔽路足昏埃逆
水驚迎雨將生鵝怕雷嵇康今轉懶騎馬半途迴

大風

夜風晝不止天理何可常正當春木榮擺磨枝葉傷東
皇務長養乃值此物狂曷不訴於帝斥之出遠方風伯

有罪五孰肯進皂囊往時歲苦旱救熱雨欲滂吹之不
使下雲雷遂深藏復搖江海波白日沉舟航又卷關塞
沙千里填河隍拔木與退鷁書傳言已詳今者天柔和
煦煦皆敷芳獨爾何不仁豪怒事雄強既其背天時誅
殛固所當鳶鳴兼虎嘯助惡黨亦昌

春風

常愁春雲低誰料春風惡搖扇無定響折榦時聞落吹
花擁細草送雨來高閣江燕倚身輕逆飛前復却

送侯寺丞知鞏縣

侯洛人

伊洛合河流正臨歸鞏路崖壁人畏崩
芹泥岸長固山迴邑郭見馬入雲煙暮
宰茲雖所淹況與鄉黨附

宋次道家摘寶相花歸清平里

往歲見此花開遲手撚羣芳因醉嗅今來
須約爛熳看及過風雨又已後主人為我
特殷勤架底深深掇孤秀密枝陰蔓不爭
開薄紅細葉共相闔先時已落已掃除
最晚堪憐予所厚呼童歸遺不可緩金盤
付與急奔驟

暮還已見映雪髻初拈尚覺香在袖官橋夜市正沽酒
沽酒共賞莫待晝

送南京簽判寇中舍

東風莫迎船船下黃流急送車猶未動顧棹已不及離
宮佳氣盤賓幙平時入因君報親舊將去江南邑

送韓奉禮隨侍之許昌

岸之側多菖蒲蒲之下多乳魚乳魚可以饌菖蒲可以
道美君調膳去且樂因使無忘寄我書

金明池遊

三月天池上都人絃服多水明搖碧玉岸響集靈龜畫
舸龍延尾長橋霓飲波苑花光粲粲女齒笑嗟嗟行袂
相朋接遊肩與賤摩津樓金間采幄殿錦文窠挈榼車
傍綴歸郎馬上歌川魚應望幸幾日翠華過

霓入聲

和應之還邑道中見寄

向老思舊交欲見恨無翅前時君來都欣喜乃一至亦
既勤我懷酌酒去拘忌自從離洛陽此會無三四謝尹

最賢豪已嗟存沒異因酬馬上篇遂寫相逢意

送韓仲文知許州

孰不為太守所榮歸故鄉僚官詫舊識邸吏窺新章前
去別馬上今仰立道傍野老拜車塵里人持壺漿至家
墳麓美謁壠雲日光盛事難盡書且舉國門觴

送薛殿丞知達州

遠郡通古川雲煙秀重疊江從巴蜀來山與岷峨接啼
鳥異方音青林四時葉使君當問俗市賈皆紅頰

依韻朱學士廉叔憶潁川西湖春色寄獻尚書晏
公且將有宛丘之命

物景有先後春工無舊新追歡成杳藹寄詠苦逡巡湖
水與濠接岸亭將寺隣艷花簋舞髻弱藻冒垂緡客奏
桓伊笛人歌柳惲蘋何嘗煩几案自得去埃塵縱語曾
忘倦從游未覺頻賦詩高壓古下筆敏如神每想魂俱
往終知夢是因廣騷常慕屈感遇亦希陳借問摘詞者
當時別乘人喜公移幕府連賞二州春

集英殿賜百官宴以雨放

春來無點雨三月始聞雷曉殿鳴簷急羣公罷食迴燕
迎風翅健馬踏霧泥開晚覺微陽透飛光上綠槐

送陳太祝歸河陽

羸馬度關去夜向河橋歸水風來何急吹裂游子衣到
家莫久留速書赴禮闈大對必有蘊時哉無闊稀

送祖擇之秘丞知海州

驥有千里足不使千里馳人有抱長才亦復不得施去

去作守長政化尚可為勿云海濱陋豈無彼黔黎事舉
訟必簡安能忘酒卮水物錯在俎醎腥應自宜朐山日
相對亦莫厭其卑蒼翠入畫戟濃淡若秀眉但向此中
樂用舍乃繫時

戊子三月二十一日殤小女稱稱三首

生汝父母喜死汝父母傷我行豈有虧汝命何不長鴉
雛春滿窠蜂子夏滿房毒螫與惡噪所生遂飛揚理固
不可詰泣淚向蒼蒼

蓓蕾樹上花瑩絜昔嬰女春風不長久吹落便歸土嬌
愛命亦然蒼天不知苦慈母眼中血未乾同兩乳
高廣五寸棺埋此千歲恨至愛割難斷剛性判以鈍淚
傷染衣斑花惜落蒂嫩天地既許生生之何遽困

與用文師

師名學佛者何乃愛吾詩吾方嗟世人各各事奔馳蒼
鷹絕海至不異攫鼠鴟所趨有遠近所向皆餒饑漱水
對無語風動庭樹枝

小女稱稱塽銘

吾小女稱稱慶厯七年十月七日生至八年三月二十
一日死嗚呼鳥獸螻蟻猶有歲時之命汝不然也汝稟
氣血為人豐然哲然其目瞭然耳鼻眉口手足備好其
喜也笑不知其樂其怒也啼不知其悲動舌而未能言
無口過動股而未能行無蹈危飲乳無犯食之禁愛惡
無有情之系若是則得天真與保和何病天之遽乎得
不推之於偶然而生偶然而化偶然而壽偶然而夭何

可必也吾將衣汝衣歛汝棺塋汝於野亦人道之常分
汝之魂其散而為大空其復託為人不可知也其質朽
而為土不疑矣富貴百年者尚不免此汝又何冤瘞之
日父母之情未能忘故書之塋非欲傳之久且以誌其
悲云銘曰

母孕而夢夢維虺虺古占女祥夫其豈然耶復占我夢
我遺我稱我名命汝平御妾媵既厲而乖胡然乎靡應
送吳冲卿學士歸蔡州

孟夏日南歸馬耳監迎風急雨不及避斷霓明向東古城汝水傍化俗寄我公君今去拜慶酥酪美將同

下土橋送刁景純忽大風韓子華先歸遺其小方巾明日持還副以此詩

昨日汴水頭共餞東去人暴風吹黃沙對面不相親歸來乘大馬悞擲小方巾平明馳奴還偷樣古逼真

刁景純期水門再別以風雨不往

餞客客未至明朝當更來風雨尋船懶車馬向城迴烏

帽吹覺重清樽想誰開終期江上見俗禮聊損裁

韓子華訪石昌言不遇石有詩韓邀和答

嘗聞載酒者去訪子雲居乃值徒御出遂令談笑虛為
泰寧乏具題鳳豈有諸一聽負荆語還想蘭相如

舟中夜聽汴河水聲

夏雨漲黃流夜鳴隣船柁乘危冒險人不識西山餓

逢王公慥太博

驚馬不惜蹄出門莫畏泥泥中逢故友十載相乖睽但

怪蒼鬢色斑斑俯鐵驪
少立不及語交策或東西向晚
我還舟君來訪長堤對論出處跡
存沒生悲啼勿言少
壯日志意吐虹霓而今七不堪懶又甚於嵇

寄題洪州慈濟師西軒

西軒無落暉所賴西庭竹竹間有古葉竹上有繁綠
夜雨一洗梢朝陽似晞沐焚香愛此心自不同諸俗

送謝著作歸陳州

騏驎泥中行偶蹶未千里終當至高衢尚苦泥行耻今

歸雨濛濛嘶鳴欲何止乃念彼名駒近在清川涘他日
見騰驤駕轡此垂耳

和石昌言學士官舍十題

病竹

水邊移得已傷根枝葉如枯生意少主人不使荒穢侵
遂長琅玕勝凡草

石榴花

春花開盡見深紅夏葉始繁明淺綠祇知結子熟秋霖

不識來時有筇竹

薏苡

葉如華黍實如珠移種官庭特葱蒨但蠲病渴付相如
勿恤謗言歸馬援

石蘭

言石曾非石上生名蘭乃是蘭之類療痢炎帝與書功
紉佩楚臣空有意

萱草

人心與草不相同安有樹萱憂自釋若言憂及此能忘
乃是人心為物易

葵花

此心生不背朝日肯信衆草能翳之真似節旄思屬國
向來零落誰能持

蔬畦

手自除荒手自鋤葱鍼已插壅薤本朝芸夕灌豈不勤
比食翦苗間且穩

水紅

江天淡淡江水平
江岸有花紅作穗
今日特向都城開
畫時只合銜魚翠

甘菊

世言此斛制頽齡
便當園蔬春競種
到秋猶得泛其英
爛醉莫辭官有俸

蘭

楚澤多蘭人未辨
盡以清香為比擬
蕭茅杜若亦莫分

唯取芳聲襲衣美

勉致仕李祕監

淵明歸柴桑家貧食不足當其勇去時不待秫稻熟借
問何以然實恥暫屈辱公常為近臣曾不輒媚曲一緣
府舍災遂使還秩祿祿仕四十年內乏釜鍾粟歸來託
四隣恓恓無片屋去就異前人其義已介獨譬之食嗟
來應自甘退縮當營負郭田漸可事水竹

送施景仁太博提點江南坑冶

楚山豈無銅楚匠豈不工大鑪常乏鑄碧卩那得充積
弊在鄉縣孰肯以利籠君今承詔行諭民當得中苟能
使之發亦莫取之窮此乃事可久山深山自通

夜泊虹縣同施景仁太博河上納涼書事

與君愛清風移榻就明月月落見星繁星繁如晝熱露
衣輕露墜響岸崩湍齧坐思都城時誰許脚不韞

施景仁邀詠泗州普照王寺古檜

來尋淮上寺老檜莫知年劫火已鎔像樛枝寧改煙根

挈怪石入節駁蒼苔堅欲問浮波箭空嗟此獨傳

送王判官同提點坑冶

地雖不愛寶利在與民共務國不務民儻有安得用孟氏美王圉其說久已誦聊此陳薄言忉怛不能重

淮雨

雨脚射淮鳴萬鏃跳點起漚魚亂目濕帆遠遠來未收雲漏斜陽生半幅

舟次山陽呈王宗說寺丞

遠客雖有樂莫如逢故人夜懷夷門時月照楚水濱自
居扁舟上隨處與船隣宜將到此日因使報朋親

送崔黃臣寺丞宰臨海

補官桐廬時已飽嚴陵釣進吏六百石又得臨海嶠因
之論出處足以見風調洪潮可登觀萬里漲川竅收縮
向何歸由來人莫料憑君能賦才庶或窮其妙

楚童

楚童能捕魚乃在水邊居手取眼不顧情知獺未如鬚

上浮萍草點點綠有餘既挈不暇理歸來莫取渠

雜詩絕句十七首

自此寶應道中
起慶歷七年夏

蛙行動萍葉悞觀作游魚稍稍引兩股已變科斗書
青草生水中日日隨水長水落何所依撩亂為宿莽
有蟲託斷葑斷葑日夕流不知止息處隨天非自由
荒水浸籬根籬上蜻蜓立魚網挂遶籬野船籬外入
茸茸翦熟絲雨染燕脂暈滿樹飲黃昏槿花無此分
青青老鏡葉下有繁實尖浪頭撥船女刺手終不嫌

岸傍草樹密往往不知名其間有啼鳥似與船相迎
青蠅何處來聚集滿盤間誰知腹中物變化如循環
水上賣瓜女摘瓜陂上田長麻已不識滿把青銅錢
買魚問水客始得鯽與魴操刀欲割鱗跳怒鬚鬣張
沙頭風雨來帖水野雲黑如觀曹公營萬弩射船側
前時雙鴛鴦失雌鳴不已今更作雙來還悲舊流水
度水紅蜻蜓傍人飛款款但知隨船輕不知船去遠
塘上挽船人塘泥深及脰落日望前村心將道途競

燕立茅屋脊燕銜芹岸泥巢成同養子薄暮亦同棲
鵲銜高樹蟬危脇縹車響露腹不曾肥殺之嗟已往
河畔有釣翁團泥為甕坐坐想秦人聲思傾杜陵酒

宛陵集卷三十二

欽定四庫全書薈要卷一萬四千四百七十三

集部

宛陵集卷三十三

宋 梅堯臣 撰

五月二十夜夢尹師魯

昨夕夢師魯相對如平生及覺語未終恨恨傷我情去
年聞子喪旅寄誰能迎家貧兒女幼迢遞洛陽城何當
置之歸西望淚緣纓

五月二十四日過高郵三溝

甲申七月七未明至三溝先妻南陽君奄化向行舟魂
去寂無跡追之固無由此苦極天地心瞽腸如抽泣盡
淚不續岸草風颭颭柎殭尚疑生大呼聲裂喉柁師為
我歎挽卒為我愁戊子夏再過感昔涕交流恐傷新人
心強制揩雙眸未及歸旅櫬悲恨何時休

過茱萸堰

茱萸堰在吳牛死茱萸堰廢吳牛間吳牛間東南百貨
來如山

詠歐陽永叔文石硯屏

虢州紫石如紫泥中有瑩白象明月黑文天畫不可窮
桂樹婆娑生意發其形方廣盈尺間造化施工常不沒
虢州得之自山窟持作名卿硯傍物

鑿山侵古雲破石見寒樹分明秋月影向此石上布中
又隱孤壁紫錦藉圓素山祇與地靈暗巧不欲露乃值
人所獲裁為文室具獨立筆硯間莫使浮埃度

永叔進道堂夜話

海風驅雲來池雨打荷急虛堂開西窓晚坐涼氣入與
公話平生事不一毫及初探易之奧大衍遺五十乾坤
露根源君臣排角立言史書星瑞亂止由不戢巨惡叅
大美微顯豈相襲陳疏見公忠曾無與明執文章包元
氣天地得噓吸明吞日月光峭古崖壁溢淵論發賢聖
暗溜聞鬼泣夜闌索酒庖快意頻舉挹未竟天已白左
右如啟蟄

贈劉謀閣副

聲名赫赫在窮塞眉宇堂堂真丈夫腰劒臂弓輕赴敵
無人不伏魏黃鬚

長蘆江口

風駕晚潮急浪頭相趁過水歸瓜步小船下秣陵多鷗
舞不停翅驚飛輕帖波今來學楚客薄暮愛漁歌

金陵懷古

秦莫恃棧閣吳莫恃漣江不能恃以德二國竟亦降邇
來屢興廢由險輕萬邦誰知荒涼城空存如剗腔我今

經其下弔古語愧嗟嗟哉石頭潮助怒常春撞

江畔

江畔菱蒲碧無主吳牛夜驪江干歸舟人不悟月已上
花脚野蚊撩亂飛

慈姥山石崖上竹鞭

江水浸石壁峭直無鳥蹤穴垂青竹根瘦虵愁作龍霹
靂雨脚入濕點莓苔封世人不得用八馬今垂慵

阻風

老魚吹浪不肯休一夜南風打籬響灘下輕舟未可行
山脚盤渦似車輞

慈姥磯下

蘆汀泱泱外露斂見孤嶂行舟每出觀漸近已殊狀傍
來認飲牛正去忽側盪水壑陰若春野鳥時與相且待
風色迴出口始浩蕩

早發

吳鷄鳴隔山江月半在水齧齧出岸潮雲雲入蒲葦解

紆泛明鏡接天知幾里我家今不遥正住句溪尾

望夫石

征骨化為塵柔肌化為石高山共蒼蒼臨水望脉脉青
雲卷為髮缺月低照額千古遺恨深終不見車軌

過碣山磯值風

山口風偏急磯頭水似煎喧聲殊倦聽逆上正難牽暗
石誰愁礙長途未擬前江心看白浪卷起大於船

碣山磯上港中泊

風惡舟難進聊依浦裏村岸潮生蓼節灘浪聚蘆根日
脚看看雨江心漸漸昏篙師知蟹窟取以助清樽

宿磯上港

夜深風浪息月正在南斗遠水生白煙踈螢出荒莽照
蟹屢蕪薪張魚未發筍獨能憐野客游宦意何有

謁昭亭廟

連峰到溪止澄溜向潭瀉廟道走山腰雀雛鳴屋瓦古
壁畫雲雷空庭儼輿馬眷予來故鄉絜齋陳奠羊尚想

昔壯童維愚託民社每從諸父賔竭至此祠下今齒踰
不惑雙親世似寡過此無所禱曷慕逢時者

昭亭潭上別

行舟晚解去親戚各還家淚落正濕衣腸翻如轉車借
是昭亭水相隨亦有涯予今游宦意曾不學匏瓜

宣州環波亭

冒暑駐輪轂徘徊北壕上棟宇起中央芙蓉生四向今
吾太守樂慰此郡人望雨從昭亭來水入句溪漲蜻蛚

立攔角朱鯉吹荷浪岸木影下布水鳥時引吭心間不
競物興適每傾釀薄暮詠醉歸陪車知幾兩

昭亭山

曰山何必高要在出雲雨昭亭非峻峰雄雄若蹲虎旱
歲一來祠霈然隨漚醑有草牧爾牛有薪資爾斧有溪
出其陰有潭在其塢獸則獐與貉魚則魴與鯉山雛水
羽聲下上相雜伍呼名如謙恭號叫若怒侮崖竹或節
踈嶺松或腹腐巨蜂結層房養子窟深土何事山中人

采以為市賈其容固已多其忍吾未取

泊姑熟江口邀刁景純相見

時陳州晏
相公辟

尾生信女子抱柱死不疑吾與丞相約安得不顧期徘徊大江側念此親相知欲留時已晚欲去情難持引領望軒車豈能慰我思願聞下士禮無曰屈非宜

見牧牛人隔江吹笛

朝與牛出牧晝與牛在野日暮穿林歸長笛初在轡面尾騎且吹音響未成雅隨風散遠近舉調任高下我方

江上來平溜若鏡瀉悠悠經醉耳亦足發瀟灑苟能和
人心豈必奏韶夏鄭聲實美好蠹情如剔剔況其荒敗
跡亦又甚裂瓦南箕成簸揚寺孟詵侈我今留此詩
誰謂馬喻馬

依韻和歐陽永叔中秋邀許發運

看取主人無俗調風前喜御夾衣涼競邀三五最圓魄
知比尋常特地光艷曲旋教應可聽秋花雖種未能香
曾非惡少休防准衆寡而今不易當

永叔詩云仍約多
為詩准備共防梅

老敵
難當

與夏侯繹張唐民游蜀岡大明寺

秋葉已多蠹古原看更荒廢城無馬入破冢有狐藏寒
日稍清迥羣山分潁蒼田衣指白水此下是雷塘

寄麥門冬於符公院

佳人種碧草所愛凌風霜佳人昔已歿草色尚蒼蒼陸
行載以車水行載以航於今五六年與我道路長思人
不忍弃期植寒冢傍我嗟復北去安得畢此喪留植精

舍中遠挈防根傷他時京峴下不比野蒿黃

送張唐民

楚甸有行客西風一孤舟遠隨淮月上若與星槎浮野
岸襲幽芳氣清露已秋得意美魚蟹白酒問沙頭

秋夜同永叔看月

青天有右目昏明不常開常時翳雲氣古鑑生莓苔秋
夜特清徹乃顧漸西迴靈兔不擣藥是夜無纖埃與君
玩流景置酒臨層臺單衣濕白露鳴鴈方南來以言歡

未終鴈聲一何哀

中秋不見月答永叔

天嫌物兼美而使密雲藏已向石屏見何須照席光

和永叔中秋夜會不見月酬王舍人

主人待月敞南樓淮雨西來斗變秋自有嬋娟侍賓榻
不須迢遞望刀頭池魚暗聽歌聲躍蓮的明傳酒令優
更愛西垣舊詞客共將詩興壓曹劉

觀永叔集古錄

古碑手集一千卷河北關西得最多莫怕他時費人力
他時自有錦蒙駝

觀舞

坐上作

誰憐嬌小好腰支老大而今莫那伊太守風流未應淺
更教多唱楚人辭

留別永叔

舊友競留連我征時已晚但言會合難豈道行路遠行
路到有期別離未即返明當各相思念此去且懶

觀永叔畫真

良金美玉不可畫可畫唯應色與形除却堅明盡非寶
世人何得重丹青

畫真來嵩

廣陵太守歐陽公令爾畫我憔悴容便傳髣髴在縑素
只欠勁直藏心骨與我貨布不肯受此之鑒卜曾非庸
公今許爾此一節爾只丹青其亦逢

別後寄永叔

前日辭親淚又為別友出愁極反無言欲言詞已窒荷
公知我詩數數形美述茲道日未堙可與古為匹孟盧
張賈流其言不相昵或多窮苦語或特事豪逸而於韓
公門取之不一律乃欲存此心欲使名譽溢竊比於老
郊深愧言過實然於世道中固且異謗嫉交情有若此
始可論膠漆

登揚州北門

樓上山如淡墨畫城中水似輕藍按揚州今似乃州景

似聽中和樂職歌

因目痛有作

已為貧孟郊拚作瞎張籍詩句但口吟世事不眼歷既
能分好惡難用變青白讀書聽吾兒且未廢朝夕

宿邵埭聞雨因買藕茨人迴呈永叔

秋雨鴈來急夜舟人未眠亂風燈不定暝色樹相連寒
屋猛添響濕窻愁打穿明朝持藕使書此寄公前

寄許主客

昨日山光寺前雨今朝卻伯堰頭風野雲不散低侵水
魚艇無依尚蓋篷藕味初能消酒渴蓼芳猶愛照波紅
揚州有使急迴去敢此寄聲非塞鴻

八月二十二日迴過三溝

不見沙上雙飛鳥莫取波中比目魚重過三溝特惆悵
西風滿眼是秋蕖

牛背雙鸚鵡

牛背雙鸚鵡煙陂共入時草枯行解美日晚趁羣遲閒

載寧辭遠相鳴不間雌初驚牧人去飛上野桑枝

廣陵歐陽永叔贈寒林石硯屏

磷磷石屏上濃淡樹林分隔水見寒島暗枝藏宿雲賢
哉吾益友持以贈離羣琥珀不須問中心多化蚊

岸貧

無能事耕獲亦不有鷄豚燒蚌熬槎沫織蓑依樹根野
蘆編作室青蔓與為門稚子將荷葉還充犢鼻裋

村豪

日擊收田鼓時稱大有年
爛傾新釀酒飽載下江船
女髻銀釵滿童袍毳氎鮮
里胥休借問不信有官權

晚雲

黝黝日脚雲斷續如破灘
忽舒金翠尾始識秦女鸞
又改為連牛綴燧懷齊單
伺黑密不囂額額城未剋
風吹了無物猶立船頭看

苻

苻葉光於水鉤牽入遠汀
淺黃雙蛺蝶五色小蜻蜓
老

死懷江女飄浮笑楚萍西風莫苦急孤藥有餘馨

晚日

晚日晴還暖人間見物機葉枯蟲自畏窓響蜜尋歸林
下見收柿水邊聞擣衣吾嗟久為客却愧寄荆扉

寄酬發運許主客

淮上秋來物意閒又乘輕舸信帆還一浮一沒水中鳥
更遠更昏天外山斜幅纏蹄兵吏至濃金灑紙領珠頒
欲酬已覺不能敵盡日臨風思自慙

前日

前日揚州去酒熟美蟹螯秋風淮陰來沙暖拾蚌蛸不言爾貧富只繫其鄙夷漢重二千石後世何忽之

淮陰

青環瘦鐵纜繫在淮陰城水腥多長短林枝有直橫山
夔一足走妖鳥九頭鳴韓信祠堂古誰將袴下平

哀王孫

泗水赤龍將欲飛
瘦蛟在泥雲未歸
冰蠶煮灰寒水擊

長大王孫抱饑色誰知適自下鄉來日吳可哀猶未食
菰飯白漿持與君王孫王孫何復云

沛公歌

赤帝醉提龍劍行徑草没人壯士驚白蛇斷裂不可續
神姬哀哀夜深哭酒醒自負氣生虹從者日畏天下雄
秦皇玉輿來向東安知隱在芒碭中婦人自識雲氣從
王命艱哉豐沛公

宛陵集卷三十三